

Odobren GeoConnect donatorski projekt za Federaciju BiH

29.01.2025 09:10



Infrastruktura prostornih podataka Federacije Bosne i Hercegovine

Federalna uprava za geodetske i imovinsko-pravne poslove

Federalna uprava za geodetske i imovinsko-pravne poslove sa zadovoljstvom objavljuje da je odobren projekt *GeoConnect: Povezivanje geoinformatičkih ekspertiza za odgovorno i transparentno upravljanje*.

Ovaj značajni projekt, finansiran od strane Vlade Kraljevine Nizozemske kroz program Matra Government to Government (Matra G2G), ima za cilj jačanje infrastrukture prostornih podataka Federacije Bosne i Hercegovine (IPP FBIH www.ippfbih.gov.ba) u skladu s evropskim i međunarodnim standardima. Ukupan budžet za provedbu projekta iznosi 1,1 milion eura, a trajanje projekta predviđeno je na četiri godine (2025–2029).

GeoConnect je rezultat dugogodišnje saradnje Federalne uprava za geodetske i imovinsko-pravne poslove sa vodećim evropskim institucijama u oblasti geoprostornih podataka. Implementaciju će predvoditi **Kadaster International** (Nizozemska agencija za katastar, zemljišne registre i mapiranje) i **Fakultet za**

geo-informatičke nauke i daljinsko istraživanje Univerziteta Twente (ITC), u saradnji sa Građevinskim fakultetima Univerziteta u Sarajevu i Mostaru te Belgijskim katoličkim univerzitetom KU Leuven.

Ciljevi projekta uključuju:

- Unapređenje kapaciteta koordinacionog tijela i subjekata IPP u Federaciji Bosne i Hercegovine za upravljanje prostornim podacima kroz specijalizovane treninge i programe mentorstva.
- Razvoj standardizovanih i interoperabilnih geoprostornih podataka, usklađenih s INSPIRE direktivom Evropske unije.
- Podizanje svijesti o važnosti prostornih podataka u upravljanju javnim resursima, održivom razvoju i donošenju odluka zasnovanih na podacima.

Projekat, koji će trajati četiri godine, realizovat će niz aktivnosti poput tehničkih radionica, studijskih posjeta, edukativnih programa i javnih kampanja za povećanje svijesti.

Federalna uprava za geodetske i imovinsko-pravne poslove, kao glavni korisnik i koordinator projekta unutar Federacije BiH, naglašava važnost ove inicijative za jačanje odgovornog upravljanja i pripremu Bosne i Hercegovine za buduće članstvo u Evropskoj uniji. Zahvaljujemo svim partnerima na ukazanom povjerenju i radujemo se zajedničkoj implementaciji ovog strateškog projekta.